



Gabinete Fronteiras
Marítimas
Konsellu ba
Delimitasaun Definitiva
Fronteiras Marítimas
Díli, Timor-Leste
+670 7742 5544
info@gfm.tl
www.gfm.tl

Gabinete Fronteiras Marítimas mak Sekretáriadu ba Konsellu ba Delimitasaun Definitiva ba Fronteiras Marítimas, ne'ebé responsabiliza ba negosiasaun ba fronteiras marítimas ho Indonézia no Austrália.

Semináriu Fórum Rejional ASEAN nian (ARF): Rezolusaun ba Disputa no Lei Tasi nian, Díli, 27-28 Feveireiru 2020

Iha 27-28 Feveireiru 2020, Timor-Leste, Malázia no Austrália servisu hamutuk hodi sai uma nain ba ARF kona-ba Rezolusaun ba Disputa no Lei Tasi nian. Semináriu ne'e hala'o iha Díli iha Ministériu Finanzas. Gabinete Fronteiras Marítimas (GFM) hola parte mos iha komisaun organizadora no servisu hamutuk ho Timor-Leste nia Ministériu Negósius Estranjeirus no Kooperasaun (MNEK) nune'e mos ho Estadu rua seluk hodi halao semináriu ne'e hamutuk.

Semináriu ne'e halibur partisipante sira husi área akademia, no pratikante sira ne'ebé ho esperiensa barak ona kona-ba Lei Tasi nian hodi fahe sira nia matenek kona-ba perspetiva rejional no internasional nian. Fórum ne'e haré ho klean liu kazu oioin ne'ebé iha ona, no foka liu ba prosesu konsiliausaun entre Timor-Leste ho Austrália nian, hanesan kazu foun ida ne'ebé susesu.

Iha nia diskursu prinsipal, Xefe Negosiador, S.E. Xanana Gusmão hateten, "UNCLOS konsiliausaun ne'e hatudu ona promesa sistema no orden internasional nian ne'ebé bazeia ba regras. Tanba ne'e mak Fórum ida ne'e importante tebes – halibur hamutuk ema hotu ne'ebé bele defende sistema internasional no sira ne'ebé komprende importánsia lei tasi nian." Nia mos haforsa

iha "governansa tasi nian ne'ebé diak liuhusi lei tasi nian ne'e importante tebes hodi proteje ita nia futuru no promove dame no seguransa global."

S.E. Ministru Agio Pereira, hanesan Ajente durante prosesu konsiliausaun ne'e, ko'alia kona-ba prosesu ne'e tuir Timor-Leste nia perspetiva. Diretora Ezekutiva Elizabeth Exposto fahe nia esperiensa rasik durante nia simu pose hodi lidera GFM. Nia hateten katak delimitasaun fronteiras marítimas ne'e la hanesan ho polítika nasional sira seluk. "Ida ne'e hanesan kestaun soberania permanente nasaun nian. Nune'e, hakat dahuluk mak atu asegura katak ita hakat ba oin ho unidade. Molok ita konsidera mekanizmu sira ne'ebé iha hodi hetan rezolusaun ba disputa ne'e, ita primeiru presiza ekipa ida, ne'ebé unidade, ne'ebé bele tur hamutuk no konkorda ba hakat ida tuir mai ne'e."

Hanesan ema ida ne'ebé defende makas ba orden internasional ne'ebé bazeia ba regras, Dr. José Ramos-Horta iha nia diskursu hodi taka semináriu ne'e bolu ba, "Estadu sira atu utiliza lei internasional no/ka mekanizmu no kooperasaun sira iha rejaun hodi rezolve disputa sira tuir lei internasional."

Haré diskursu sira iha ne'e www.gfm.tl

Semináriu Fórum Rejional
ASEAN nian (ARF):
Rezolusaun ba Disputa no
Lei Tasi nian, Díli,
27-28 Feveireiru 2020



Fórum Estadu Arkipélagu no Illa sira (AIS), Manado, Indonézia, 1 Novembru 2019

“ Ha’u promote atu respeita no komprende kultura lokal, no proteje patrimóniu natural, iha fatin hirak ne’ebé ha’u tau ain ba. ”

– Representante AIS halo Juramentu Ekoturizmu.

Fórum ne’e ko’alia kona-ba tópiku hat ne’ebé importante tebes ba kompromisu ne’e mak hanesan: ekonomia azul, mudansa klimátika, plástiku hirak ne’ebé hafoer tasi, no governansa diak marítima nian. Representante sira konkorda hamutuk katak hakat fundamental ba oin mak servisu hamutuk ho respeitu malu. Kompromisu prinsipal ida representante sira halo mak atu respeita kultura lokal nian.

Timor-Leste ho AIS 24 seluk partisipa iha Fórum ne’e. Xefe Negosiador, S.E. Xanana Gusmão no Embaixador Roberto Soares mak representa Timor-Leste.

Fórum Demokrasia iha Bali ba dala 12: Demokrasia no Inkluzivu, 5-6 Dezembru 2019

Fórum ne’e estabesele iha 2008 hodi “promove no haburas valor demokrasia nian ne’ebé progresivu iha rejiaun Ázia Pasífiku”, Ministra Retno Marsudi hateten iha nia diskursu. Fórum ne’e harí bazeia ba igualdade, koñesimentu no respeitu malu. Diskusaun durante loron rua ne’e, partisipante sira haforsa no konsidera katak feto sira nia partisipasaun hodi foti desizaun ne’e hanesan pilar demokrasia ida ne’ebé fundamental.

Nasaun 80 resin mak partisipa inklui Timor-Leste.

Semináriu ARF ba daruak kona-ba Implementasaun UNCLOS nian no Instrumentu Internasional sira seluk hodi Rezolve Disputa Marítima hirak ne’ebé Mosu Mai Tan, Hanoi, 13-14 Novembru 2019

GFM simu konvite ida hodi ba partisipa iha fórum ne’e hamutuk ho MNEK iha Hanoi, Vietnam. Fórum ne’e foka ba disputa marítima hirak ne’ebé iha rejiaun nia laran. Panelista sira haré ba sasukat hodi implementa UNCLOS ho didiak no loloos. Sira haré mos ba instrumentu internasional sira seluk hodi rezolve disputa marítima hirak ne’e, ne’ebé inklui disputa sira kona-ba soberania, delimitasaun fronteiras marítimas, no kestaun transfronteira sira seluk, hanesan implementasaun lei tasi nian, polusaun marítima, mudansa klimátika, nune’e mos tretorizmu no piratas.



Partisipante sira, Hanoi, Vietnam, 14 Novembru 2019

Konstituisaun Oseanu ne'e sei Saudável ka, Lae? Konferénsia kona-ba Nasoens Unidas nia Konvensaun kona-ba Lei Tasi nian ne'ebé halo ona tinan 25, Hamburgu, Alemaña, 17-18 Outubru 2019

Hodi selebra Aniversáriu UNCLOS nian ba dala 25, Xefe Negosiador, S.E. Xanana Gusmão simu konvite hodi fó diskursu prinsipal ida iha Tribunal Internasional Lei Tasi nian (ITLOS) iha Hamburgu, Alemaña iha 17 Outubru 2019. Konferénsia ne'e hanesan oportunidade ida ba matenek nain sira iha área ne'e atu reflete kona-ba saida mak UNCLOS atinji tiha ona durante tinan 25 ne'e.

Xefe Negosiador ko'alia kona-ba importánsia UNCLOS nian ba Estadu illa kiik sira no istória susesu konsiliaaun entre Timor-Leste ho Austrália nian. Nia hateten, "Hau hein katak painel ida ne'e no konferénsia ida ne'e sei haré ba ami nia istória ne'ebé susesu la sai hanesan razaun atu, selebra deit, maibé liu-liu hanesan razaun ida atu, foti asaun. Lihusi ezemplu ida ne'ebé ami atinji ona ho Austrália, ami hatudu ona katak orden bazeia ba regras sei bele atinji justisa, ekuidade, no liu-liu, soberania."

David Bosco husi Hamilton Lugar School of Global & International Studies, Universidade Indiana, konklui konferénsia ne'e ho Timor nia istória: "Timor nia ezemplu ne'ebé susesu ne'e lori esperansa. Esperansa ida ne'ebé hamutuk ita bele rezolve dezafiu mundial sira ne'ebé hanesan ho dame no lalais no kria serteza ba governasaun oseanu nian. Timor nia ezemplu ne'e fó hanoin fali mai ita katak liuhusi UNCLOS ita atinji buat ne'ebé importante ba povu ida ne'ebé eziste duni."

Komisaun organizadora mak Indiana University's Hamilton Lugar School of Global and International Studies, Universität Hamburg no Fundasaun Internasional ba Lei Tasi nian. <https://hls.indiana.edu/unclos/index.html>

Xefe Negosiador ho nia delegasaun mos aproveita oportunidade ida ne'e hodi halo reuniaun estratéjiku ida antes, iha 14-15 Outubru, ho advogadu internasional sira ne'ebé hola parte ba ita nia ekipa legal. Iha reuniaun ne'e ko'alia mos kona-ba prosesu hodi hetan fronteira marítima ida ho Indonézia.

Timor-Leste nia Simeira kona-ba Mina no Gas, Dili, 3-4 Outubru 2019

Ho autorizasaun ANPM nian, IN-VR Oil & Gas, kompañia ida iha Reinu Unidu, organiza Timor-Leste nia Simeira internasional ba dahuluk kona-ba Mina no Gas.

Simeira ne'e fó oportunidade ba Timor-Leste hodi envolve ho partisipante sira iha industria ne'e, no ko'alia ho investedor sira. Eventu lora rua ne'e halibur hamutuk representante sira husi nasaun 16 no kompañia 200 resin iha área ne'e.

Governu nia Representate Espesial ba Petróleu no Xefe Negosiador, S.E. Xanana Gusmão, afirma katak "Setor petróleu ne'e hanesan pilar prinsipal ida ba dezvoltamentu ita nia nasaun nian. Hamutuk ho turizmu no agrikultura, Timor-Leste nia Planu Estratéjiku Dezvolvimentu hatudu petróleu hanesan industria estratéjiku ida ne'ebé haburas ita nia ekonomia, kria servisu no progresu ba ita nia futuru hanesan nasaun ida ne'ebé susesu no metin."

Timor-Leste nia simeira ba daruak nian planu ona ba 8-9 Outubru 2020 iha Dili. <https://www.timorleste-summit.com/>



Xefe Negosiador iha ITLOS, Hamburgu, 17 Outubru 2019

Vizita ba Daruak kona-ba Fronteiras Terestres, RAEOA, 17-22 Agostu 2019

GFM lidera vizita daruak kona-ba fronteiras terestres ba daruka ne'e ho MNEK no Ministériu Justisa no ho apoiu total husi Unidade Polisia Fronteira (UPF) no F-FDTL.

Embaixador Roberto Soares mak lidera delegasaun Timor-Leste nian ne'e. Embaixador ne'e mak lidera Negosiasaun Tékniku kona-ba Fronteira Terestre nian entre Timor-Leste ho Indonézia. Vizita nia objetivu mak atu, haré ba oinsa atu hafaha segmentu hirak ne'ebé seidak rezolve iha Naktuka, kontinua halo peskiza iha Haumeni-Ana no defini pontu determinante sira iha Mota-Ain Batugede.

Timor-Leste nia delegasaun hetan ona informasaun no dadus relevante husi vizita ne'e, ne'ebé sei sai hanesan rekomendasaun ba nai-ulun Estadu rua nian hodi determina desizaun ikus ida kona-ba liña fronteira ne'e.

Timor-Leste ho Indonézia konkorda tiha ona ba prinsípius sira kona-ba desizaun ikus ba fronteiras terestres nian iha 22 Julu 2019. Estadu rua ne'e halao ona sira nia vizita conjunta ba iha RAEOA iha fulan Maiu 2019, hodi halibur informasaun relevante kona-ba segmentu rua ne'ebé seidak rezolve, iha Noel Besi/Citrana no Bidjael Sunan-Oben.

Komisaun Organizadora ba Selebrasaun Aniversáriu Konsulta Popular Tinan 20 no Misaun INTERFET nian

Governu kria Komisaun Organizadora ida [KO] hodi organiza selebrasaun ba Aniversáriu Konsulta Popular nian ba dala 20 (30 Agostu) no Misaun INTERFET nian (20 Setembru). S.E. Kay Rala Xanana Gusmão sai hanesan Prezidente KO. KO inklui Konselleiru Prinsipal, Konselleiru [6], Koordinator Jeral no Vise Koordinator [6], Sekretáriadu, no ekipa kiikoan sira ne'ebé responsabiliza ba komunikaun no relasaun públika, transporte, animasaun, no seguransa [12].

Sekretáriadu ne'e apoiu KO inklui Sekretáriadu tolu ne'ebé iha Koordinator nia okos. Diretora Ezekutiva GFM, Elizabeth Exposto, sai hanesan Koordinator ba Sekretáriadu ne'e, no GFM mak halao atividade sira sekretáriadu nian.

Sekretáriadu ne'e responsabiliza ba:

- prepara termu referénsia;
- promove reuniaun komisaun nian no prepara dokumentu sira;
- halo esbosu, responde no fó sai korespondénsia KO nian; no
- fornese apoiu administrativu no tékniku ba seksaun 12 sira seluk.

Sekretáriadu ne'e organiza reuniaun jeral kuaze 15 no reuniaun seluk entre Seksaun sira. Sekretáriadu mos fahe konvite besik 1.700 ba iha nasaun laran tomak no 450 resin ba konvidadus internasional. Timor-Leste konvida ema 2.200 resin ba eventu ne'e.

Nai-ulun Estadu sira nian, inklui eis-titulares sira, husi governu rai seluk nian, membru Governu Timor-Leste nian no Parlamentu Nasional, no dignitáriu sira seluk mos partisipa iha serimónia ne'e. Konvidadus internasional sira inklui Prezidente Assembleia Portugal nian; Primeiru-Ministru sira husi Austrália, Guine Bisau, no Vanuatu; Vise Primeiru-Ministru Kambodia nian; no Representante sira husi Indonézia, Nova Zelandia, São Tomé Prínsipe, Kabo Verde, Venezuela, Vietnam, Laos, Tailandia, Guine Equitorial, Fransa no Singapura. Representante husi Dioseze Dili no Maliana mos hola parte hotu. Korpu diplomátiku sira husi nasaun lubuk ida mos partisipa hamutuk ho dignitáriu sira seluk.

Selebrasaun ne'e hahú husi 1 Julu to'o 30 Agostu iha munisípiu Timor-Leste nia laran tomak. KO promove dansa no múzika tradisional hodi prezerva Timor-Leste nia kultura no istória nasional no asegura katak sei pasa ba jersaun tuir mai. Selebrasaun ne'e taka ho serimónia oficial iha Tasi Tolu iha 30 Agostu.



Prezidente KO iha reuniaun ida molok selebrasaun ne'e, Ministériu Finansas, Julu 2019



Prepara konvite ba konvidadus sira iha Timor laran, GFM, Agostu 2019

Selebrasaun Aniversáriu Konsulta Popular Tinan 20 no Misaun INTERFET nian – 30 Agostu

Timor-Leste ho Timoroan sira luta durante tinan 24 nia laran ba independénsia. Iha 5 Maiu 1999, Governu Indonézia no Portugal asina Akordu ida, iha Nasoens Unidas nia mahan, hodi hala'o Referendu ida iha 30 Agostu, ne'ebé fó dalan ba Timoroan sira hodi desidi sira nia futuru. Iha loron ne'e, Timoroan rihun ba rihun bá vota-fatin hodi vota.

Iha 4 Setembru 1999, Xefe Misaun UNTAET nian, Ian Martin, fó sai "katak rezultadu votasaun nian: ema 94.388 mak vota afavor no 344.580 mak vota kontra proposta autonomia espesial ne'e". Timoroan sira vota barak tebtebes ba independénsia, hodi hakotu okupasaun no sofrimentu durante tinan 24 nia laran, no halo 30 Agostu loron istóriu ida ba Timor-Leste.

Hafoin rona tiha rezultadu ne'e, violensia sai makas liutan iha nasaun laran tomak. Infraestrutura sira, uma sira no edifísiu públiku sira, ema estraga hotu. Ema rihun ba rihun mak sai refujiadu, no ema rihun seluk mak mate. Konsellu Seguransa Nasoens Unidas nian aprova hodi forma Forsa Dame ida, INTERFET, ne'ebé to'o mai iha Timor-Leste iha 20 Setembru 1999.

Timor-Leste agora sai nasaun independente ida ona, nasaun livre no demokrátika ida ne'ebé halo progresu boot iha nia dezvoltamentu, hafoin liuhusi luta ne'ebé naruk. Timor-Leste kontinua promove demokrasia iha nasaun laran no luta ba dezvoltamentu ne'ebé sustentável.

Hodi komemora loron istóriu ne'ebé halo ona tinan 20, KO prepara programa ho atividades oioin mak hanesan tuir mai ne'e:

Selebrasaun iha Tasi Tolu – 30 Agostu

Serimónia oficial ba selebrasaun Aniversáriu Konsulta Popular nian ba dala 20 ne'e hala'o iha Tasi Tolu. Serimónia ne'e ho konvidadus 2.200 iha tenda tolu, ho palku prinsipal ida no kiik ida ba apresentasaun husi grupu kultural sira.

Timoroan rihun ba rihun mak halibur hamutuk hodi asisti apresentasaun kultural sira, hanesan múzika no dansa, no mos serimónia fahe premiu ba manan nain desportu no arte nian.

Serimónia oficial ne'e hahú ho Ino Nasional, orasaun ekumenikal, grupu banda sira hananu hodi konta mos Timoroan sira nia istória liuhusi fotografia sira, no mensajen ida husi Sekretáriu-Jeral ONU António Guterres. Tuir fali Prezidente Repúblika, S.E. Francisco Lú-Olo fó diskursu ida no kondekora Medalla Orden Timor ba apoiante Timor nian balu. Iha mos konsertu husi artista no banda lokal no internasional, no mos grupu múzika no dansa kultural sira, hodi fó onra ba grupu solidariedade internasional sira nia tulun ba Timoroan sira iha tempu susar nia laran.



Konsertu molok serimónia ofisial, Tasi Tolu, 30 Agostu 2019

Serimónia ofisial, Tasi Tolu, 30 Agostu 2019



Orasaun Ekumenikal




Sek-Jen ONU nia mensajen: "Timor-Leste sai ona inspirasaun ba mundu."



Sira ne'ebé simu Orden Timor



Dili Allstars hananu "Maubere Timor" ho fotografia sira hatudu Timor-Leste



Dansa tradisional no fogete

Timor-Leste ho Austrália Troka Nota kona-ba Ratifikasaun Tratadu Fronteira Marítima – 30 Agostu

Primeiru-Ministru Timor-Leste ho Austrália, Taur Matan Ruak no Scott Morrison troka nota diplomátika hodi hatudu katak Tratadu Fronteira Marítima iha Tasi Timor ne'e hahú vigora ona. Serimónia ne'e hala'o iha Palacio do Governo iha Díli.

Troka nota diplomátika ne'e marka hakat ikus ba prosesu naruk ne'ebé hahú tinan tolu liu ba, iha Haia, ne'ebé Timor-Leste hili hodi hahú Komisaun Konsiliaun ida tuir Nasoens Unidas nia Konvensaun kona-ba Lei Tasi nian (UNCLOS).

S.E. Kay Rala Xanana Gusmão mak lidera negosiasaun ne'e hanesan Xefe Negosiador ba Konsellu Delimitasaun Fronteiras Marítimas. Estadu rua ne'e finaliza Tratadu ne'e iha 2017, no asina iha Nova lorke iha 6 Marsu 2018. Estadu rua ne'e ratifika Tratadu ne'e iha Julu 2019.

Ho Tratadu Fronteira Marítima vigora ona ne'e, área dezenvimentu hamutuk (JPDA) tama ona mai Timor-Leste nia jurisdisaun. Hanesan luta ikus ba soberania kompleta, Tratadu ne'e mos representa dezenvimentu ekonomia no sosial ba Timoraon sira.

Bele haré Tratadu ne'e iha ne'e: http://www.gfm.tl/wp-content/uploads/2018/03/Port-Timos-Sea-Maritime-Boundary-Treaty_Portuguese.pdf



Primeiru-Ministru Scott Morrison ho Primeiru-Ministru Taur Matan Ruak troka nota diplomátika, Palácio do Governo, Díli, 30 Agostu 2019

Lé fila fali Rezultadu Referendu 30 Agostu nian – 4 Setembru

Tinan 20 liutiha, Sr. Ian Martin, hanesan eis-Reprezentante Espesial Sekretáriu-Jeral ONU nian, fila fali mai Timor-Leste. Nia fila fali mai hodi hala'o buat ne'ebé hanesan no iha fatin hanesan, iha agora Hotel Timor. Nia lé fila fali, testu ne'ebé hanesan, testu ne'ebé nia lé ona iha 4 Setembru 1999 hodi fó sai rezultadu konsulta popular 30 Agostu nian.

Hamutuk ho S.E. Primeiru-Ministru Taur Matan Ruak, ne'ebé prezide minutu silensiu, no Eis-Prezidente, Dr. José Ramos-Horta, Sr. Ian Martin mos inagura plaka ida hodi hanoin hikas fali loran ne'e.

Eventu ne'e tuir fali ho Marsa Dame ida ba Sentru Konvensaun Díli (CCD). Ema atus ba atus mak partisipa, inklui membru governu no parlamentu nasional, konvidadus sira, foinsae sira, estudante sira no komunidade sira.



Serimónia lé fila fali rezultadu konsulta popular nian, Hotel Timor, Díli, 4 Setembru 2019



Marsa Dame, Díli, 4 Setembru 2019

Selebrasaun Misaun INTERFET nian – 20 Setembru

30 Agostu 2019 marka tinan 20 ba konsulta popular istóriu ne'ebé lori Timoroan sira ba independénsia. Selebrasaun ba Timoroan nia vota ne'e sei la kompletu se la ho rekoñesimentu ba papel INTERFET nian iha tempu ne'ebá hodi ajuda hapara violensia iha rai laran. Iha 20 Setembru, KO organiza ona eventua memoravel mak hanesan tuir mai:

Serimónia Oficial hodi Selebra Aniversáriu INTERFET nian ba dala 20

Prezidente Repúblika, S.E. Dr. Francisco Guterres Lú-Olo, prezide serimónia oficial ida iha dadeer iha Palacio do Governo hodi selebra misaun INTERFET nian mai iha Timor-Leste.

S.E. Prezidente Repúblika, no Eis-Komandante INTERFET, Sir Peter Cosgrove mos fó diskursu durante selebrasaun ne'e. Atu envolve mos foinsa'e sira, Ania husi Atabae mos fahé nia esperiensa durante luta ba independénsia no INTERFET.



Ania husi Atabae (klaran) hafoin serimónia ne'e, Palácio do Governo, 20 Setembru 2019



Plaka fó onra ba Forsa INTERFET

Ba dedikasaun no sakrifísiu soldadu no ema sivil sira nian, sira ne'ebé hola parte ba INTERFET, Timor-Leste ofere se plaka ida hodi fó onra ba Forsa ne'e. Prezidente Repúblika no Eis-Komandante INTERFET mos tau aifunan hodi hanoin fali sira ne'ebé mate ona durante luta ba Timor-Leste nia independénsia.

Marsa Memória ba Veteranus FALINTIL no INTERFET no Almosu Amizade ida

Hafoin serimónia oficial, Sir Cosgrove lidera Marsa Memória ba CCD ho bandeira orijinal INTERFET 1999 nian.

Veteranus FALINTIL no INTERFET 250 resin mos participa hotu. Marsa ne'e hodi hanoin fali sakrifísiu tomak Misaun INTERFET nian iha Timor-Leste. Serimónia ne'e taka ho almosu amizade ida ne'ebé S.E. Dr. José Ramos-Horta mak prezide.



Marsa hodi hanoin fila fali INTERFET, 20 Setembru 2019

Tasa Cosgrove / Xanana – Jogu Amizade

Hodi hatudu amizade entre Timor-Leste ho forsa INTERFET nian, veteranus FALINTIL ho INTERFET no ekipa nasional F-FDTL no Forsa Defeza Austrália hala'o jogu amizade ida ba Tasa Cosgrove / Xanana. Veteranus atus ba atus hamutuk ho Timoroan sira 1.000 resin mak asisti jogu ne'e.

Tasa ne'e fahe ba parte rua. Sesaun primeiru, veteranus FALINTIL kontra veteranus INTERFET. Kompetisaun ida ne'ebé vibrante tebtebes. Iha sesaun ikus, ekipa nasional F-FDTL nian mak joga kontra Forsa Defeza Austrália nian. Sesaun ne'e nakonu ho amizade no mos kompetitivu.

Hein katak Tasa Cosgrove / Xanana ne'e sai hanesan eventu anual.



Jogu amizade ida ne'ebé extraordináriu, Estádio Nacional, Dili, 20 Setembru 2019

Konvidadus internasional sira no nai-ulun nasaun nian balu mos, hili oportunidade ida ne'e hodi hasoru S.E. Xanana Gusmão, inklui Primeiru-Ministru Austrália Scott Morrison, Primeiru-Ministru Vanuatu Charlot Salwai, delegasaun ida husi Estados Unidos, nune'e mos Sr. Ian Martin rasik.

S.E. Xanana Gusmão mos ABC (Australian Broadcasting Corporation) fó sai iha nia notísia, nune'e mos Sir Peter Cosgrove no S.E. Dr. José Ramos-Horta, iha dokumentáriu especial ida, 'A Call to Arms: The Liberation of East Timor'. Favor haré iha ne'e: <https://www.youtube.com/watch?v=FhN7zIIXgk4>



Primeiru-Ministru Austrália nian hasoru malu ho Xefe Negosiador iha Dili, GFM, 30 Agostu 2019

Formasaun GFM nian, Outubru – Dezembru 2019

GFM fó prioridade ba formasaun funsiunáriu lokal sira nian. GFM fó oportunidade ba funsiunáriu sira hodi tuir kursu Inglés no Português iha LELI. Ba formasaun hirak ne'ebé iha rai laran la iha, GFM haruka nia funsiunáriu sira bá tuir iha rai liur. Iha Outubru – Dezembru 2019, funsiunáriu sira tuir kursu sira kona-ba administrasaun, komunikasaun no relasaun públika, no mos kona-ba operasaun no jestaun aprovizionamentu nian.

Ida ne'e akontese tanba iha kolabrasun ne'ebé diak tebtebes ho Fundos Desenvolvimento do Capital Humano (FDCH).



Kursu Jestaun Aprovizionamentu ho Sr. Surachman ST (karuk), SpectraCentre, Jakarta, 4-18 Outubru 2019



Kompetensia Esensial ba Asistente Ezekutiva, New Horizons, Brisbane, 4-7 Novembru 2019



Kursu Intensivu Komunikaun no Relasaun Públika, ISOC, Londres, 4-15 Novembru 2019